

Alperöösli



2017

S'näggscht Eidgenössische, Schwingerfescht
kunnt nach Baasel, daasch dr Bescht
do chömmen den Männer, so richtig haarti
dr Minu meint sicher, s git e Swinger-Phaarti

Wenn me an Terrorismus dänggt
do wird üüberfaare und au gspränggt
mir zwäi sind ganz friidligi Daame
wenn mir spränge, spränge mir nur dr Raame

In Baasel, im Milieu, isch jetz markiert
wo sich e Drottwaaramsle, platziert
isch klar, uff em Hoof, dass es anders goht
do isch markiert, wo dr Muni stohrt

Bim boschte, liid iich immer Gwaale
muess füür Säggli, fünf Rappe zaale
dehäim bin iich no schlimmer draa
mii alte Sagg, wot niemer graatis haa

S'isch billiger als Taxi, aber nit ganz suuber
e Chauffeur-Dienscht, bekannt als Uber
wotsch denn aber no mee spaare
denn gits nur ains, e Schugger-Kaare

Vegan, biologisch, laktosefrei
und kai Gluten, dr letschi Schrei
wäär so lääbt däm ka's bassiere
duet me am Änd denn komposchtiere

Är suecht und fluecht, unsere Gnächt
unsere Gülle-Waage, wo isch dä ächt
sii het en versteeggt, verzellt unseri Maagd
will dr Erdogan, Gülen-Aahänger jaagd

Uff dr Donald Trump, do sind mir stolz

mir sind glaub uss em gliiche Holz

sini Frisuur, das isch e Gnuss

gseht wie s'Ändi, vomene Kueschwanz uss

BÄFFZGI

Fasnacht 2017

Sali zämme scheen sin dr alli doo hitt
normal gänn mir s'Pfeetli zem Gruess nur aim sicher nit
Hand uff's Härz bi däm will sich doch kain uffdränge
wär mecht scho d'Händ vom Jogi Löw aalänge.

Im Appizäll deert hänn's dr Alpabstiig all Joor
und de Bärgstyger stoht nonem Gipfel dr Wandabstiig bevor
und z'Basel macht yss dr Källerabstiig all Joor gluschtiger
aber dr Zürcher Abstiig finde mir vyyl luschtiger.

Im Raiehyysli Nummere 2 will dr Walti Spahn
dr Gotthard-Basis-Tunnel nochebaue an dr Modäll-Ysebahn
aber hinde im Nummere 12 hett denn d'Famile Roth
nid welle ass dä Tunnel au duur ihre Käller goht.

Mir hänn WC-Papier brucht und sinn's go boschte mitenand
aber dehai isch's mer immer verrisse in dr Hand
y ha welle wisse wie das lumpig Papier haisst das jääse
und ha tatsächlich uff dr Verpaggig PUMA glääse.

Y ha Brexit gläse und immer Brexit gheert
aber nie rächt gwisst was das bedyttet und das hett my gsteert
bis y emol Durchfall gha ha do fallt mr grad Brexit yy
das muess doch s'latinische Wort fir dr Schysser syy.

Y ha e Note gfunde und ha se denn ins Fundbüro doo
no sait dä deert dasch jo e Fälschig und hett se in sy Hosesagg gnoo
eerschtens haigs e 5 statt e 1 druff und e Null zweenig haigs au
und zwartens sey die Note au no grien anstatt blau.

Im Rhybadhyysli im Redrose oder bim Sutterbegg
im Zauberlädeli in dr Gasse Kuchi oder im schife Egg
in dr Condomeria oder bim Räntner Wyss diens di glyy zwinge
dass du an däne Ort di Poscht sellsch hole oder bringe.

Friehner hänn sich d'Kätzli wild und frey proschituiert
worum hett me ihres Revier so grien markiert
dr Grund isch will ihre Verkehr deert ökologisch sey
und dr Uss-Stoss isch zwar nit grien aber schadstofffrey.

Uff em Bundesroots-Raisli wo die Bundesreet all Joor mache
kontrolliert unterwägs dr Schneider Ammann sini siebe Sache
är hett Rägeschutz Redbull Flachmann und Proviant zem Ässe
nur dr Ruggsagg wo das alles dryy kunnt hett är dehai vergässe.

Mir hänn en App vom Putin und aini vom heggshete türkische Maa

und aini vo däm mit em Katzfäll uff em Kopf in Amerika

wenn jetz ain e Saich abloot drugg ych sy App fescht duure

denn griegt däjeenig via Internet e paar uff d'Schnuure.

Sone Hundepargg uff em Märtplatz y ka's jo verstoooh

die wänn nur mit däne Daggel uss em Roothuus Gassi goo

deert hett's au e Herzogs-Pudel und e Brutschi-Wau-Wau

und e Jack Wessel und e Niederlauf-Baschi hett's au.

Es git e Studie ibere Donald Trump und syne Eskapade
deert haisst's sy Vatter sey tschuld an däm sym Schade
är haig'n als Kind drey Mool in d'Luft gworfene und allem aa
hett er'n dummerwyys nur zwai Mool uffgfange gha.

Wottsch au by uns bängle?

Uff www.vsg-basel.ch erfahrsch meh!

Drugg: Amerbach'sche Druckerei, Muttenz



www.bäffzgi.ch

Fasnacht 2017



Mir zwai – mir sin zwai Pfadibuebe und sinn allzyt bereit
und mir vollbringe alli Daag e gueti Tat zu zwait
Mir düen bi dr Swiss – in allne Flieger – e Schüüfeli verstaue
Denn kenne die, wenn si Zwischelande, weenigschtens e Iglu baue

Wenn ich aim saag – ich find – dass du e Ziegefigger bisch
Denn isch's e bitzeli kritisch – wenn das dr diirggisch Präsi isch
E Belaidigung – kaa das nid syy – drum isch das nyt prekäär
Denn s'könnnt jo syy – dass di Geiss – no yverstande wär

Zum e Fuessballspiel – zgwünne – muesch die richtige Spieler wääle
Und Taktik isch au no wichtig – die derfsch im Match denn nid verfäale
E Profi-Trainer – wie dr Jogi Löw – hett vyyl gleert us schlaue Biecher
Drum hett er au – die richtig Hand und oft e guete Riecher

Dr Eric Wäber nimmi im Grosse Root – für ihn e Katastrophe
Sythär kenne mir zwar guet – aber är z'Nacht nimmi schloofe
Syy Doggter hett ihn – untersuecht – s'Resultat liggt uff em Tisch
Das sogar – dBluetgruppe – vom Wäber, Null positiv isch

In China stoot e Muur – gross – und hoch – und breit
D Chinese hän's Broblem erkannt – hett sich dr Donald gsait
Sone Muur – nützt offesichtligg – sait dä ohni Verstand
Will d'Chinese hän jo au kaini – Mexikaner in ihrem Land

Kenne Sie s'Äffle und s`Pferdle – au no vom Fäärnsee
Friener hän – mir die zwei – amme au no gärn gsee
Doch jetz sin uns – die beide aber – so richtig fescht verlaidet
Mir glaube dr Dürr – und d'Ackermaa hän sich – als die zwei verglaidet

Im Internet hän mir welle – e Ferieschnäppli bueche
Und sin bi 400 Ferieabieter e Hotel im Netz go sueche
Nachere Wuche no 50 Aagebott – das soll no aine raffe
Zwai Wuche spööter hän mir gmerggt – mir mien wieder go schaffe

Zwei Räägewürmli – drei Hoppelhäsl – jo die woone deert
Mir wänn au nid – dass es d'Faadewürmli und d'Kääferli z'fescht steert
Und wenn denn no zwai Schwarzkehlchen ihr Liebesnäscht deert finde
Denn mache mir das Schwingfest halt – nid im Aescher Fäld hinde

Züri brucht e neue Name – und zwar ein mit Rasse
Sommerau – hän mir uns dänggt – würd prima zur Stadt basse
E Namenswäggsel isch ächt böimig und au no richtig schlau
Denn Züri isch im Winter scheisse – und im Sommer au

Dr Shiva, dr warm Indianer wott jetz no go jasse
Das würd jo prima zu däm Samschtigjsasse basse
Was wänn mir denn für e Jässli klopfe – e Coiffeur oder ächt e Schiiber
Denn sait si Partner, «Ach liebe Mike» e Schiiber wär mir lieber
E Schiiber – meint dr Mike – bisch du nid ganz bache
Und wenn i denn zwei Dame han – weiss ych nid was mache
Dä will doch nid vier Buure wiise – dr Shiva isch e fräche
S'goot ihm doch numme drum – e Büürl mit sinere Eiche z'stäche
Mittlerwiile isch e riise Stimmig – im Studio mien alli lache

Jetzt froogt dä no si Partner – «söll ich's dir obe oder unde uffe mache?»

Do seit dr liebi Mike ganz glase und e bizli stumpf

I bi schwach – ha nüd in dr Hand – aber mini Schälle di sin Trumpf

Danggscheen für die glatti Zyt mir hän viel zämme glacht

Drum gön mir zwei jetz witter... und winsche «e scheeni Fasnacht»

Wottsch au by uns bänggle?

Uff www.vsg-basel.ch erfahrsch meh!



Fasnacht 2017

A black and white illustration of a woman's face. She has a very wide, dark-brimmed hat that covers most of her hair. Her eyes are large and dark, looking directly forward. She has a prominent nose and a thick, dark mustache. The style is somewhat caricatured or dramatic.



o am Mässer wetze

Wo mit em Laschtevelo durch d Stadt due
Vorne inn dr Baschi, er macht e Idruck e V
Wo e gratis Dienschtfahrt het könne uuse
S'Drämmli isch z langsam und Taxi sin m
Uhr auf der rechten Seite, am rechten Lüü

Los mi vome Schugger fahre, vom Claraposchte
Vor em Roothus stehen Lütt es herrscht e gedäm
Gits wäg em Baschi Dürr z'Basel e Revolution
Oder wäg em Parkplatzabbau e Demonstration
Nanai s isch der besti Platz für das Go POKEMON

Dr Baschi wäscht, dr Wessels duet si Sitz warm halte
Und s Heidi het me knapp nit gwählt
Will: E Mück-eseggeli het do gfählt

Znacht im Dunkle, bi dr Altkleidersammlig
Wiehlt e Schatte in de Sägg, unpfläggt und gammlig
Zorecht dänk ich das sinn Räuber us em Oschte

Sie, ich gseh sie, und bini grad verschrogge
Ha no e kleine Schock, würd am Liebschte aanehogge
Ich frog sie jetzt eifach, imene höfliche Doon
Sinn sie jetzt sone Horror Clown

E Binggis maint das isch denn schön
Lueg Mammi derd sind zwai Horror-Glöön

Z Aesch seit e Hääsli zum andere Haas
Wäg däm Schwingerfescht waggst do, scho b

Mir zichen zu de Schwoobe, die schanc daas.
Sie, begriffe sie den die Schwoobe
hän e genetische Defäggt im Hohlruum oobe
Lade zu sich ii, dr halbi Oschte
flueche aber yber d'Schwiizer wo bi ihne poscht

Wottsch au by uns bänggle?



Fasnacht 2017



Nachtschwärmer

So n'e Horror-Clown kunnt um dr Egge
Und wot uns schyynbaar grad verschregge
Mir frooge iin, wie's iim so goot, es het uns interessiert
Är verzellt, är haigi nur – mit emme Samsung 7 delifoniert

Bald schiggit Zalando Päggli mit Droone
Diräggt dört aane wo mir woone
Mediamarkt, möcht Liefer-Roboter, die düüse dur s'Quartier
Bi mir dehai, isch alles bim Alte, do bringt mir d'Frau no s'Bier

In Tschernobyl, bim AKW
Mir händ das am Fäärnsee gsee
Jetz isch dört e Deggel druff, um d'Umwält vom Übel z'schütze
Mir sind sicher, so n'e Deggel, wurd au in Ziiri nütze

Im Rootlicht Quartier, ganz im Vertraue
Gseesch jetz am Boode so grieni Fraue
Die Griene im Rootliecht, passt no guet, isch sicher nid verfäält
Schliesslig het me, wie so oft, wieder rot-grien gwäält

Mache mir emol e Fescht
Verwööne mir denn unseri Gescht
Lactosefrey, ooni Gluten, vegan, biologisch und soo
I däm Fall gits halt numme Wasser, und das duur dr Britta-Filter gloo

Unseri Schugger, händ mir erfaare
Faare in dr Freizyt mit Schugger-Kaare
Als Geegeleischtig, händ si denn, e Tatsach wo keine kennt
Wäärend em Dienscht, reegelmäässig, derfiir im Büro pennt

Wäärr uns kennt, waiss, mir vier
Suffe gärn emool e Bier
Mir händ vernoo, Bier sig gsund, es het bitz Vitamin C
Gsundheitsbewusst, wie mir sind, suffe mir jetz mee

Mir vier, das passt wunderbaaar
Jasse gärn, das isch doch glaar
Undenuffe, obenaabe, e Slalom ka's au syy
Hauptsach isch, mir wänd das soo, isch kai Trump-f derbyy

An dr Ski-WM in Sankt Moritz

Flitze si obenaabe wie dr Blitz

So schnäll wie meeglig dunde syy, nur das zellt, das isch gspunne
So betrachtet, hätti doch, d'Fäärnsee Kamera gwunne

Wenn me an d'Fuessball EM dänggt

Dänggt me an Löw, wo in d'Hose länggt

Me het denn drier spieggiert, är miech das wäg em Stress

Äär het denn d'Hand an d'Naase ghebt ... chlii stingge muess es

Wottsch au by uns bänggle?

Uff www.vsg-basel.ch erfahrsch meh!

Drugg: Amerbach'sche Druckerei, Muttenz



Fasnacht 2017

D'Schnaps bagge

I ha im Quarter underperformat und ha dr Supervisor wägem Outplacement im Gnigg, Gemäss HR isch my WorkLifeBalance Out of Control – jetzt bringe si's aber digg, Dr CEO sait: «Sabbatical näh, Resette, mit Fighting Spirit in eTop Ranking g'lange.» ...ka mir epper sage, was uf änglisch haisst: «Ihr kennet mir alli an Ranze hange!?»

Do die «Handschlag»-Affäre z'Therwil, mit däne junge Muselmane?
gemäss Koran beriehre si nur die aigeni Frau – wo fiehrt das no aane?
Fraue sin z'underdrugge, sait das Buech – d'Feminischtinne mache e Riesegjammer
dängg ych an d'Heidi Mück, find ich aber dr Koran dr Hammer.

Als Veganer nimm ych Spangle zer Vorspiis und e Pfäfferminz, das tuet au haile,
denn e Blätzli us Dinkel und e Salatblättli – wo ych tue mit em Meersäuli taile.
Denn git's e Portion Bohne und mit Fänelcheltee spüehl ich mini Niere,
Und wenn ych emol stirb, loss ych mi fachgerächt im Garte kompostiere.

Mi Sohn isch Master of Advanced Studies in Digital Business – Wow
Mi Tochter isch Certificated in Human Capital Management – e erfolgrichi Frau.
Bachelor of Sciene in Nursing – friehner hesch Granggeschweschter gsait
Mi Brueder isch CFO specialized in Reporting und Head Insurance Right.
Mi Frau isch Leader in Front End Engineering und coacht e Junior Clerk, oder zwai...
Ych ha kai Titel – bi Shopping-Assistant und hard working Putzhobel dehai.

Isch irgendneume e Hundsverlochete - mit gratis Häppli, Schämpis und Wyy,
kasch bombesicher sy, do isch d'Sabine Pegoraro derby.
Ych ha das letschthi aim verzellt, dä hett mi denn uff d'Historie verwiese:
...im vorletschte Joorhundert häb me uff die Art amme die Bedyrftige gspyyse.

Ey Mann Fuessball-EM letscht Joor, isch geil gsi Alte, aber Scheisse für Albanie,
aber Island Alte – Island!! – tönt gaaanz kalt, aber isch glaub in Nöchi vo Spanie.
Waisch, Wales – «Ey Alte, was isch Wales?» han i gfroggt eini, wo isch bi mir gsässe,
hett gsait: «Ey chill Alte, weisch Wels – isch doch Fisch, Mann – kasch au frässse!»

Mängmol bin ych nur uff dr Jagd noch Pokemons – jo, es git halt so Dääg,
do lauft mer bim ene Pokemon Stop in dr Freye so e Monschter yber e Wäg.
Ych ha das Teil grad welle aabehagge – mit Power und Schmalz
do sait e Passant näbe mir zue'nem: «Tag Frau Ackermaa, au scho uf dr Walz?»

Wenn im Wessels s'letschte Stündli schloot, ligt är vor s'Himmelsdyyli wie e Flundere,
legt d'Händ uff s'Härz und wenn är s'Wasser ka bhalte, tät's mi wundere,
Der Herrgott wird deerte stoh, mild lächle und sage – voller Gnaad:
«Hanspeter, du griegsch kai Wolge – fir di hämmer e Kischtevelo parat!»

Meine Damen und Cherren, missen wir sein nicht bleed,
will ich, dass alle Leute in Schweiz das Weg, das will ich, mit mir geht.
Habe ich lustige Arbeit und wenn rede ich deitsch, werde ich froh.
Jä – toll, Herr Petkovic, aber s'wär no geil, wenn me sie au wurd verstoh!

Was ych jetzt verzell, stimmt – ych wurd jo nie ybertryybe
in de dytsche Altershaim wän si Sex per Rezäpt verschryybe.
Jetzt hän mir Zwai – falls das au in dr Schwyz passiert,
im Seniorezentrum vorsorglich zwai Zimmer reserviert.

Drugg: Amerbach'sche Druckerei, Muttenz



**Wottsch au by uns bängle?
Uff www.vsg-basel.ch erfahrsch meh!**